

五月的天清清

時間咧過真緊，一年一年過去，佇我無感覺當中汝大學畢業做兵做煞出社會食頭路矣，一日曝汝也做工課十年矣，古早人講成家立業，汝卻是早早就做了立業成家的拍算。

今年（2018），汝佇踏入社會十年後成了家有了家己的家庭，我是滿心的歡喜。

會記得汝讀冊的時陣捌問過我對汝的婚姻的看法，我嘛會記得我共汝講過，毋管汝按怎選擇，單身或者是組織一个家庭，攏無影響汝是我的後生這個事實，我是完全接納完全支持汝的任何做法。汝閣問我若是結婚無生团我會按怎，我共汝講有生無生我攏無意見，因為日子是汝咧過的，彼時汝大大放鬆落來，汝問我敢無「不孝有三，無後為大」的想法，我講天跤下的团仔攏會使看做是家己的团，毋免一定愛家己生的才是团。

講著這，我就想著有的人真愛喙講有孝，卻是無真正了解啥是有孝。我真無贊成到這馬二十一世紀矣，猶有人是為著欲予父母阿公阿嬤歡喜去結婚生团，這若叫做有孝，我會講是憨孝。另外一種人是認為會當提一寡錢予序大人做所費就是有孝，知影回報養育之恩當然是愛共伊肯定的，但是這種有孝是小孝，而且若是態度無夠恭敬，抑不如無提所費予父母的人，這按怎講呢？

佇《論語》這本記錄孔子語錄的冊內面，子游問孝的時，孔子予伊的回答是：「今之孝者，是謂能養。至於犬馬，皆能有養；不敬，何以別乎？」

我共团仔上課的時定定會舉一个例，我講若是一个人賺了袂少錢，伊買鮑魚、魚翅欲予序大人，可是買轉去厝的時，是用抨的予伊的父母，「提去食啦！」態度真糗，若像呼狗咧，按呢的態度就算買閣較名貴的物仔予序大人，序大人心情嘛袂爽快。

另外對反的情形是，一个人做小工辛苦賺錢，因為所賺無濟，干焦會當買俗俗的物仔，比如一碗二十箍的肉燥飯孝敬父母，但是因為伊是雙手捧去父母面前，口氣真溫順：「爸爸媽媽，這是我買轉來的肉燥飯，恁食看覓咧！」汝講父母食起來是毋是心情會較愉快？

所以，所謂的有孝毋是予父母的錢濟抑少，是彼个態度的問題。

佇子夏問孝的時，孔子真清楚講：「色難。有事，弟子服其勞；有酒食，先生饌，曾是以為孝乎？」

對待父母的面腔真要緊，雖然講有代誌會替父母去做，有食物嘛會先提予父母食，可是若攏一个臭面予父母看，父母敢會歡喜？這敢是有孝？

《論語》這本冊內底有真濟做人做事的道理，在我看起來毋但古早適用，就算是二十一世紀的這陣提來參考，嘛是無退時。

汝的讀冊量真大，有一句話汝一定嘛讀過，「半部論語治天下」。

這句話是宋朝初年的宰相趙普所講的。趙普是宋太祖趙匡胤上信任的心腹參

謀士，北宋開國功臣，忠心耿耿輔佐趙匡胤。到了宋太宗的時，宋太宗趙匡義問趙普，人講汝所讀干焦《論語》爾爾，趙普回答講：「臣平生所知，誠不出此，昔以其半輔太祖定天下，今欲以其半輔陛下致太平。」

雖然治國毋是干焦靠一本半本冊就會使得，但是《論語》這本冊真正提供了袂少做人做事的方向。汝國中一年的時，我開的作文班，每一節課一定愛讀一兩章《論語》，彼當時恁攏讀了真快樂。看起來彼時的接觸有帶予汝一點仔啟示，後來無論對朋友抑是對父母對小妹，汝攏是真心對待，和顏悅色；食頭路做代誌，對頂司對下司嘛是堅守本分，盡心盡力。

做人真正就是一个真，若有真心，代誌怎會做袂好？若有真心，人怎會無相挺？

咱有真心對待人，人嘛一定會真心對咱，絕對袂「真心換絕情」，這是一條吳宗憲作詞作曲恰唱紅的歌，「交給你的心，你放置叨位，風雨中的感情，你甘還會記，無奈秋風彼呢冷，陣陣吹惦胸前，心虛的笑容，是你最後的表情……不願相信我的真心，最後換來一場絕情……」

我永遠相信真心袂食虧，若是真正有食一點仔虧，咱就想做食虧就是佔便宜。

勢計較的人無一定就得著較濟，我相信这个道理汝了解，汝一向就毋是會計較的人，天公有看著，會保庇汝平安順利、萬事如意，這是我對汝的祝福。

有一寡人攏將序細的成就講做是父母的栽培，我真無愛聽這款的言論。

其實是序細家己的努力拍拚，腳踏實地一步一腳印慢慢行出家己的一片天，做序大的人是愛替伊們歡喜，歡喜家己的序細有才情，歡喜家己的序細知分寸、知拍拚。序細若有出脫，是伊們致蔭序大，予序大有面子有好名聲，是序大愛感謝序細才對。

佇《禮記》這本冊內底，曾子講過一段話，伊講：「孝有三：大孝尊親，其次弗辱，其下能養。」

飼父母，予父母一寡錢，是上小的有孝，無必要掛踎喙邊。这个道理汝真了解，因為汝明白我講過的話，外人按怎看咱有外人伊們的想法，咱家己心內清楚是怎樣的一回事就好矣，日子是咱家己咧過的，人生是咱愛對家己負責的，與他人無關。

汝所知影的，我較看重的是汝的做人。

以往我定定提起《大學》內底曾子所講的「十目所視，十手所指，其嚴乎。」咱人愛時時想著有十粒目睭咧金金看咱，有十隻手直直咧指咱，所以行事攏愛謹慎，毋管啥時陣攏毋通傷大意，一个無注意失差錯，可能就會跋甲真悽慘。三國故事的「大意失荊州」咱攏真清楚，失去荊州是關羽一生的汙點，甚至伊的命嘛是因為這個事件所造成的影響來無去。所以怎會使無謹慎，千千萬萬愛記得，隨時愛看顧予好家己的一舉一動一言一行。

人若呵佬汝，我會感覺無上的光榮，這是無價之寶，較濟錢嘛買袂著的。

汝是我的团，一路汝看我，完全了解我毋是看錢重的人。汝出社會第一年的母親節，予我的母親節禮物是五萬箍，汝愛我用遮的錢出國去迤迤，可是我將遮

的錢攏總捐出去。彼時，毋是我無愛出國迢迢，是我想著汝遮爾有孝心，做媽媽的我會當回饋啥物予汝？後來我想著我應該愛予汝閣較濟的祝福，這個祝福就是將汝的孝心轉做愛心奉獻出去。

我真歡喜咱兩個母仔因理念相全，心意相通，我佈施奉獻的猶無汝濟，所以汝嘛袂怪我無將汝欲予我的禮物留踎身邊。

過去 將近三十的時間，我做的是體制外的教育，講實在的，汝我對咱國家的教育政策有淡薄仔無認同，雖然我是佇體制內完成教育的，汝慢我將近三十年，嘛是接受體制內的教育，卻是因為咱曾經佇這款死板的教育文化內底溜過，咱知影死板的教育毋但無法度開發學生因仔的智慧以外，閣較慘的是甚至有可能將因仔的聰明捏斷去。

我一直真欣賞孔子先生的有教無類以及因材施教，距離咱這陣數千年前的孔子，早就發現每一個人有無全的天資、個性以及才能，教育就愛針對學生的專長去開發，予學生會當人盡其才。可是咱的教育體制是逐家讀全款的冊，學習的進度全款，考試的範圍全款，這是學習的無公平。

我家已教因仔作文，就對每一個因仔有無全的天資有真深的感覺，平平聽全款的講解內容，有的因仔真緊就理解矣，有的因仔卻是霧煞煞，愛一再解釋予伊聽。這個情形反映佇寫作文面頂閣較明顯，當然有一方面嘛是參因仔的閱讀有關係，看較濟課外讀物的因仔思考較靈活，寫出來的文章嘛較通順較有內容。像寫文章這方面就袂使要求每一個因仔攏寫平長，寫出來的內容嘛愛差不多程度，這是完全無可能的代誌，活潑的因仔佻閉思的因仔寫出來的文章絕對無相全。

所以，如何接受無全本質的因仔，如何對待每一個可愛的因仔，其實無啥困難，愛是上基本的態度，完全包容完全接納是上好的做法。

汝的婚禮舉行了後，汝共我講感覺家己的責任較大矣。

汝真正是一個有擔當的查埔因仔，汝清楚婚姻袂使清彩，決定結婚是愛對另外一個查某因仔負責，愛擔起家己組織的小家庭的責任。

將來換汝愛面對下一代的陪伴佻教育，我非常相信身教比啥攏較重要，言教只是指導別人的作法，如果指導的人普通時的舉止行動參伊講出喙的完全無全，接受伊教示的人如何口服心服？如何學著好的行為以及智識？所以咱欲教人，欲愛咱的序細行為端正，首先咱家己的行為就毋通犯差錯，袂使得講一套做一套。

咱定攏對這馬的社會風氣，以及一寡少年因仔的行為袂當認同，這個問題出佇佻位？其實咱攏心內清楚，教育這個問題是非常嚴肅以及重大的，可是真濟父母攏想講將因仔送去學校讀冊就是教育的全部，敢是按呢？因仔去學校讀冊一工才幾點鐘，因仔佇厝內的時間比佇學校較濟，應該講佇社會的時間長過佇學校的時間，我為啥物按呢講？因為家庭就是一個小型的社會，教育又閣是學校、家庭以及社會三方面的集合，所有作父母的人、所有社會上有影響力的人，敢捌認真思考過這個問題？

所以某一方面來講，家庭教育恰社會教育的重要性懸過學校教育。如果家長無注意著這點，如果各階層的政治人物公務人員地方仕紳無發覺著這部分，無想著愛按頂頭到下跤，按地方到中央，共同協力為教育下一代教育人民設想，欲改變社會風氣可能較難。

只要人人按家己本身好好做起，一段時間了後，社會風氣一定會有變化，守規矩講道理有禮貌真客氣的情形就會到處攏是，若是這種日睷看耳仔聽自然學著的品行充滿規社會，咱的社會敢袂好？咱的國家敢袂好？

當然，咱袂當要求別人恰咱全款的想法做法，社會閣較亂閣較無是非，咱嘛愛堅持做對的代誌、堅持咱的做人基本、堅持做一個守本分守規矩守禮節的人。較早汝恰妹妹細漢的時，我攏共恁講，咱一個好人影響一個人，都有兩個好人矣，兩個人閣影響兩個人就四個人矣，按照按呢的情形一直加起哩，咱的社會就會有愈來愈濟的好人，嘛是真有希望的。

我對咱的國家就是抱著按呢的信心。

對汝我嘛真有信心，我更加相信日後汝做爸爸的時，也是會用汝的人生信仰來對待汝的囝。

五月天清清，漸漸欲燒熱起來，我看著的是汝清朗的人生漸漸發揮影響力；我看著的是汝恰新婦合力經營的美滿家庭；我看著的是一幅那畫那嬌的圖，這幅圖有開闊的海面，這幅圖予我的眼界愈來愈闊。

汝去看過幾佬擺五月天的演唱會，阿信作詞作曲的臺語歌〈金多蝦〉，汝應該是有聽過才對。

「美麗的地球，有美麗的海洋，海洋裡住著很多生命，很多魚很多蝦。金多蝦、金多蝦……多謝你這多年來，一直陪伴我唱歌……我不管要衝啥，你攏會站在我這，十七歲的吉他，到現在攏沒變化，……大漢之後，有這麼多變化，佳在有你陪我，在這一直挺我，挖心挖肝感謝。」

前幾工汝佇米國利用感恩節去遊大峽谷，汝將相片傳來予我看，我看著遐爾壯觀的峽谷景色，對大自然的鬼斧神工實在真佩服。雖然是汝去的所在，我卻是佇相片內底感受著我若像嘛佇現場，感謝汝予我的眼界拍較開。

咱所生活的這粒地球，有真濟美麗的風景，咱真正是愛好好寶惜。

對臺灣這塊土地，對高雄這個港都，咱攏愛時時心存感謝，咱生活佇這個所在，一路行來的平安，是這塊土地的好山好水好風景好人情致蔭咱的，愛對伊講一句「真多謝」！

海拍開汝的眼界，汝拍開我的眼界，我感受著的世界愈來愈闊愈來愈嬌。

我嘛愛對汝講一聲「真多謝」！

真多謝這世人汝我的母囝情分！